

# Vedtekter

## KINSARVIK BÅTLAG

### VEDTEKTER

Vedtekne på årsmøtet 21. april 2016, gjeldande straks.

#### § 1 Namn og føremål

Namnet  
til Båtlaget er: Kinsarvik Båtlag

Kinsarvik Båtlag sitt føremål er å samla båtinteresserte i arbeidet for å:

- Skapa og halda vedlike ei god og trygg hamn.
- Samarbeida med lokale styresmakter for å løysa aktuelle oppgåver innafor ramma av føremålet.
- Ta vare på medlemene sine rettar til fornuftig utnytting og bruk av hamneområdet.

#### § 2 Medlemskap

Som medlem kan styret ta opp einkvar båtinteressert som er samd i, og som vil arbeida for føremålet til Kinsarvik Båtlag. Medlemskapen fylgjer kalenderåret. Utmelding skjer skriftleg til styret.

Ein medlem som med si åtferd vekkjer forarging, verkar til skade for Båtlaget, eller ikkje rettar seg etter vedtektene og hamnereglementet til Båtlaget, kan få skriftleg åtvaring av styret. Dersom dette ikkje fører fram, kan medlemen verta ekskludert etter vedtak av styret.

#### § 3 Kontingentar

Båtlaget  
har følgjande kontingentar:

- Innmeldingsavgift (eingongsavgift) ved tildeling av bryggje
- Innskot

(depositum) ved tildeling av bryggje (vert betalt attende ved utmelding)

- Årskontingent
- Årleg bryggjeleige
- Dugnadsavgift ved fråvær frå dugnad

Kontingentane gjeld kalenderåret, skal fastsetjast på årsmøtet og betalast etter tilsendt faktura med nærare fastsett forfall. Dersom det ikkje er betalt innan nærare fastsett frist etter puring, kan styret etter gjeve varsel stryka vedkomande som medlem, og tilvist båtplass kan verta ført attende til båtlaget. Oppgjer for depositum med frådrag av restansar vert å betala ut når båtplassen er tildelt annan medlem. Avgjerda kan ikkje ankast inn for årsmøtet.

Styret har likevel fullmakt til å inngå betalingsavtalar og fastset sjølv retningsliner og vilkår for slike avtalar.

#### § 4 Organa til Båtlaget.

Dei administrative organa til Kinsarvik Båtlag er:

·  
Årsmøtet

·  
Styret

·  
Eventuelle nemnder

Det skal førast protokoll frå alle års- og styremøte.

#### § 5 Årsmøtet

Årsmøtet er øvste mynde til Båtlaget og vert halde kvart år, til vanleg innan utgangen av mars året etter og seinast innan utgangen av april. Medlemene vert kalla inn med 14 dagars varsel ved skriftleg innkalling til kvar medlem. Innkallinga skal ha vedlagt sakliste. Saker som ein medlem ynskjer handsama på årsmøtet, må vera mottekne av styret seinast 7 dagar før årsmøtet.

Vedtak i årsmøtet vert gjort ved vanleg fleirtal. I tilfelle røystelikskep har leiaren dobbelrøyst.

Årsmøtet kan ikkje gjera vedtak i saker som ikkje står på saklista.

Det er ikkje høve til bruk av fullmakt korkje på ordinært eller ekstraordinært årsmøte (§6 nedanfor).

Det ordinære årsmøtet skal handsama:

- a. Årsmeldinga til styret
- b. Rekneskapen i revidert stand, under dette ev. merknader frå revisorane
- c. Fastsetjing av kontingentar som nemnt i §3.
- d. Framlegg frå styret til budsjett.
- e. Sjå til at tidlegare vedtak er utførde.
- f. Andre saker som står på saklista, herunder innkomne framlegg.
  
- g. Val i samsvar med det som står nedanfor:

Medlemer til styret, kvar av dei skal veljast for to år om gongen:

.  
Leiar

.  
Skrivar

.  
Kasserar

.  
To styremedlemer

Ombodet som nestleiar skal leggjast til ein av dei fire andre styremedlemene, også dette for to år.

Dei enkelte medlemene til styret skal veljast enkeltvis, og slik at vekselvis to / tre går ut annakvar gong.

To varamedlemar til styret i nummerert rekkjefølgje, kvar for to år om gongen.

Valnemnd på to personar, som skal koma med framlegg til val for neste årsmøte.

## § 6 Ekstraordinært årsmøte

Ekstraordinært årsmøte kan kallast saman etter ønskje frå styret eller når minst 1/3 av medlemene krev det, og det må då haldast seinast ein månad etter at styret har fått oppmoding om det.

## § 7 Styret

Kinsarvik Båtlag vert leia av eit styre på fem personar med nummererte varamedlemar.

Styret har det administrative myndet, representerer Båtlaget i ulike samanhengar, syter for alle løpande saker, tildeler båtplassar, kallar inn til møte og tek hand om økonomien til Båtlaget. Styret nemner opp dei nemndene som er turvande for å løysa bestemte oppgåver, med mindre desse vert valde av årsmøtet. Styret held møte så ofte det finn det turvande. Leiar kallar inn til styremøta. Elles kan utanom leiaren eit fleirtal av styret kalla inn til styremøta. Styret er vedtaksført når leiaren, eller nestleiaren i hans fråvær, og minst to styremedlemar er til stades. Formannen pliktar med si underskrift Båtlaget andsynes tredjemann. Kasserar i Båtlaget fører rekneskapen. Styret skal i god tid innan årsmøtet syta for at rekneskapen vert lagt fram for kontroll og revisjon hjå ekstern rekneskapsfører. Rapport frå kontrollen vert lagt fram for årsmøtet

## § 8 Tildeling og oppseiing av båtplassar, framleige

Innbyggjarar i Ullensvang herad skal prioriterast framfor personar frå andre kommunar ved tildeling av båtplassar. Båtplass vert tildelt etter ansiennitet som medlem i Båtlaget dersom det er venteliste. Båtplass i hamna kan berre tildelast medlemar i Kinsarvik Båtlag. For tilvist båtplass vert å betala innmeldingsavgift og innskot fastsett av årsmøtet.

Tilvist båtplass kan berre overdragast til andre direkte frå ein medlem, til ektefelle eller registrert sambuar / partnar og familiemedlemar i rett opp- og nedstigande linje. I alle andre tilfelle ved utmelding skal båtplassen leverast attende til Båtlaget mot attendebetaling av depositum.

Framleige av båtplass er avgrensa til 2 år, og det er eit vilkår at den som leiger båtplassen, er medlem i Båtlaget. Etter søknad kan styret lengja fristen.

## § 9 Dugnad

Alle medlemene i båtlaget pliktar å delta på dugnad med eit omfang fastsett av årsmøtet for kvart år, likevel ikkje meir enn 15 timar i året. Fråvær frå dugnad vil verta fakturert med dugnadsavgift pr. time fråvær, etter ein sats fastsett av årsmøtet.

Medlemer som er over 70 år, eller er uføretrygda, kan etter søknad få fritak for dugnad / dugnadsavgift for ei bryggje. Det er eit vilkår for dette at bryggja ikkje vert leigt ut til andre. Arbeid i styret, revisjon og liknande oppdrag tel som dugnadsarbeid.

## § 10 Endring i vedtektene

Framlegg til endring eller tillegg til desse vedtektene vert å leggja fram for årsmøtet gjennom styret innan den fristen som er nemnd framanfor §5. Vedtak må gjerast med 2/3 fleirtal.

## § 11 Oppløysing

Avgjerd om oppløysing av Kinsarvik Båtlag kan berre verta vedteke med minst 2/3 fleirtal på det ordinære årsmøtet. Båtlaget kan likevel ikkje oppløysast om 10 av dei møtande medlemene krev at det skal oppretthaldast. Skulle Båtlaget verta oppløyst, skal overskytande midlar, etter at hamneområdet er klargjort for tilbakelevering til Ullensvang herad, fordelast på medlemene.